

НЕДЕЛЯ ПЯТАЯ СВЯТЫХ ПОСТОВ.

ИНИИ ТИПИЦЫ ПРЕДАША ПЕТИ В СИЮ НЕДЕЛЮ

ПОСЛЕДОВАНИЕ ПРЕПОДОБНЫМ МАТЕРЕ НАШЕЙ МАРИИ ЕГИПЕТСКИЯ.

НА ВЕЛИЦЕЙ ВЕЧЕРНИ,

На Господи воззвах, поставим стихов, 10, и поем стихире Осмогласника:

Воскресны 3, и Анатолиевы 3. И Триоди подобны 3, глас 6.

Подобен: Всю отложивше:

Стих: От стражи утренния до нощи, от стражи утренния, * да уповает Израиль на Господа.

Тебе убо възбраняше честных взирания, * скверн прежде привлеченное сквернение; * твое же чувство, и твоя богомудрая содеянных совесть, * к лучшим тебе обращение содеяша. * На икону бо възревши благословенныя Богоотроковицы, * всех покаявшеся прегрешений своих, всехвальная, прежних, * в дерзновении Честному Древу поклонилася еси.

Стих: Яко у Господа милость и многое у Него избавление * и Той избавит Израйля от всех беззаконий его.

Тебе убо възбраняше честных взирания, * скверн прежде привлеченное сквернение; * твое же чувство, и твоя богомудрая содеянных совесть, * к лучшим тебе обращение содеяша. * На икону бо възревши благословенныя Богоотроковицы, * всех покаявшеся прегрешений своих, всехвальная, прежних, * в дерзновении Честному Древу поклонилася еси.

Стих: Хвалите Господа вси языцы * похвалите Его вси людие.

Местом поклонившеся радостно святым, * добродетели напутное спасительнейшее, * оттуду прияла еси, * и зело потекла еси доброе шествие; * и струю прешедши Иорданскую, * в жилище Предтечево усердно вселилася еси, * и страстей свирепство жительством омрачила еси, * истончавающеи в дерзновении, * приснопамятная мати, * плотская свойства.

Стих: Яко утвердися милость Его на нас * и истина Господня пребывает во век.

В пустыню вселившеся, * Твоих страстей образы от души отъяла еси, * боговиднейшее изображение в души написавши, * добродетелей виды; * и толико просияла еси, * яко и водами легко преходити, блаженная, * и от земли взиматися в твоих к Богу молениих; * и ныне в дерзновении всеславная Марие, * Христу предстоящи, * молися о душах наших.

Слава, глас 4:

Очудотвори, Христе, Креста Твоего сила, * яко и яже прежде блудница, * постническим подвигом подвижася; * отнюдуже и немощное отвергнуши, * доблественно сопро-тивоста на диавола. * Темже и почестъ победы носящи, * молится о душах наших.

И ныне, догматик гласа. Вход. Свете тихий:

На стиховне стихире Осмогласника.

Слава, преподобныя, глас 2:

Душевная ловления, и страсти плотския * мечем воздержания посекала еси; * помысла прегрешения молчанием обучения подавила еси, * и струями слез твоих пустыню всю напоила еси, * и прозябла еси нам покаяния плоды. * Темже Твоею память, преподобная, празднуем.

И ныне, Богородичен:

О, чудесе новаго всех древних чудес! * кто бо позна Матерь без мужа рождшую, * и на руку носящую, всю тварь содержащаго? * Божие есть изволение, рождшееся. * Егоже яко младенца, Пречистая, * Твоима рукама носившая, * и Матерне дерзновение к нему имущая, * не престай молящи о чтущих Тя, * ущедрити и спасти души наша.

Ныне отпускаеши: По Трисвятом тропарь Богородице Дево: дважды.

И преподобная, единожды. Глас 8:

В тебе, мати, известно спасеся еже по образу; * приимши бо крест, последовала еси Христу, * и деющи учила еси презирати убо плоть, преходит бо, * прилежати же о души вещи бессмертней. * Темже и со ангелы срадуется, преподобная Марие, дух твой.

НЕДЕЛЯ ПЯТАЯ СВЯТЫХ ПОСТОВ.

НА УТРЕНИ

По шестопсалмию, на Бог Господь: тропарь воскресен дважды.

Слава, преподобная, глас 8: **В** тебе, мати:

В тебе, мати, известно спасеся еже по образу; * приимши бо крест, последовала еси Христу, * и деющи учила еси презирати убо плоть, преходит бо, * прилежати же о души вещи бессмертной. * Темже и со ангелы срадуется, преподобная Марие, дух твой.

И ныне, Богородичен:

Иже нас ради рождейся от Девы, * и, распятие претерпев, Благий, * испровергий смертию смерть, * и воскресение явлей, яко Бог, * не презри, яже создал еси рукою Твоею, * яви человеко-любие Твое, Милостиве. * Приими рождающую Тя Богородицу, молящуюся за ны, * и спаси, Спасе наш, люди отчаянныя.

И обычное стихословие: и прочее последование.

По 1-м и 2-м стихословии седальны воскресны, гласа:

И полиелей. Степенны гласа. Прокимен, и Евангелие утреннее рядовое. псалом 50.

Слава, глас 8: **П**окаяния отверзи ми двери Жизнодавче, * утренюет бо дух мой ко храму святому Твоему, * храм носяй телесный весь осквернен: * но яко щедр, очисти * благоутробною Твоею милостию.

И ныне, Богородичен: **Н**а спасения стези настави мя Богородице, * студными бо окалях душу грехми, * и в лености все житие мое иждих: * но Твоими молитвами * избави мя от всякия нечистоты.

Таже, глас 6: **П**омилуй мя Боже, * по велицей милости Твоей, * и по множеству щедрот Твоих, * очисти беззаконие мое.

Множества содеянных мною лютых, * помышляя окаянный, * трепещу страшнаго дне суднаго: * но надеяся на милость благоутробия Твоего, * яко Давид вопию Ти: * помилуй мя Боже по велицей Твоей милости.

Каноны Октоиха: Воскресный со ирмосом на 4, и Богородицы на 2.

И Триоди 2 канона, на 8. Катавасия: Отверзу уста:

Песнь 1, глас 8.

Ирмос: Воду прошед яко сушу * и Египетскаго зла избежав, * израильтянин вопияще: * Избавителю и Богу нашему поим.

Оставил мя еси богатству сластей, веселящемуся на всяк день в сладости богатому. Темже Тя молю Спасе, огня мя якоже Лазаря избави.

Одеяхся Спасе сладьми, якоже обложивый себе виссон и золото, и золотую одежду: но мя во огонь якоже онаго, да не послещи.

Веселяшеся богатством и сладостию богатый, древле в житии тленнем: темже на муки осудися, нищий орошашеся Лазарь.

Богородичен: Чини Тя ангел и человек, безвестная Мати, хвалят непрестанно: Творца бо сих якоже Младенца во объятиих Твоих носила еси.

Другий канон преподобных, на 4. Глас 6.

Ирмос: Волною морскою скрывшаго древа, * гонителя мучителя, * под землею скрыша спасенных отроцы: * но мы яко отроковицы, * Господеви поим, * славно бо прославися.

Любовию светоносную и божественную твою память празднующему, свет низпосли ми, предстоящая преподобная свету неприступному Христу, искушений всяческих мя жития избавляющи.

К египтяном плотию отшедый, Неописанный и Превечный, из Египта показывает всесветлую тя звезду, ведый Господь вся прежде бытия.

Божественных заповедей честная не ведущи, божественный образ Божий окаляла еси: Божественным же промыслом паки очистила еси всехвальная, обожившись деяньми божественными преподобная твоими.

Богородичен: О Твоего Боже мой многого благоутробия, и неизреченного Твоего снизхождения! Како первее блудницу, Матере Твоя мольбами, яко чистую и непорочную, ангелом уподобил еси.

Катавасия: Отверзу уста моя, * и наполнятся Духа, * и слово отрыгну Царице Матери, * и явлюся светло торжествуя, * и воспою радуяся Тоя чудеса.

Песнь 3, глас 8.

Ирмос: Ты еси утверждение притекающих к Тебе, Господи: * Ты еси свет омраченных, * и поет Тя дух мой.

Лазаря якоже спасл еси от пламене Христе, тако мене от огня избави геенскаго, недостойнаго раба Твоего.

Богатый страстьми, и сластьми есмь, Господи, Лазарь же убогий лишением добродетелей, но спаси мя.

В червленицу и виссон облачашеся богатый, сластьми и грехами, сего ради пламенствуется.

Богородичен: Дажь нам помощь, молитвами Твоими Всечистая, прилоги отражающи лютых обстояний.

Иный преподобных, глас 6.

Ирмос: Тебе на водах повесившаго всю землю неодолимо, * тварь видевши на лобнем висима, * ужасом многим содрогашеся, * несть свят, разве Тебе, Господи, * взывающи.

Ко вратом погибели приближующую деяньми безместными, врата прежде адова сокрушивый силою Божества, врата покаяния тебе отверзает всечестная, дверь сый Сам живота.

Оружие греха Долготерпеливе прежде бывшую, оружие Креста Божественнаго поклонением показал еси, оружия бесов вся, и козни всяко побеждающую, Благоутробне.

Цену за всех, Свою прежде измявый кровь, банею слез чистую ты соделоваешь, проказною лютою болевшую злейшаго деяния, всяко еже быти всем давай.

Богородичен: Слова всякаго есть вышшее, еже на Тебе Дево: Слово бо Отчее в Тебе боголепно вселися, разрешение согрешений всем согрешающим, словом едином подаваяй.

Катавасия: Твоя песнословцы Богородице, * живый и независтный источниче, * лик себе совокупльшия, духовно утверди, * в божественней Твоей славе * венцев славы сподоби.

Кондак преподобныя, глас 3:

Подобен: Дева днесь:

Блудами первее преисполнена всяческими, * Христова невеста днесь покаянием явися, * ангельское жительство подражаючи, * демоны Креста оружием погубляет. * Сего ради Царствия невеста явилася еси, Марие преславная.

Икос: Агницу Христову и дщерь песньми восхвалим ныне, Марию приснопамятную, явльшуюся Египетское овча: и прелести сих вся избеже, и едина принесеса Церкви совершенное возвращение, воздержанием и молитвою подвизающися паче меры человеческого естества. Темже и возвыси ея и житие и деяние, един Вседержитель, Марии преславная.

Седален, глас 8.

Подобен: Премудрость и слово:

Взыграния вся плотская * обуздавши труды постническими, * мужественное явила еси души твоея мудрвание. * Крест бо Господень видети возжелавши, * самую себе всечестная мирови распяла еси: * отнюдуже и к желанию ангельскаго жительства * любезно управила еси себе всеблаженная. * Моли Христа Бога, * оставление согрешений даровати, * чтущим любовию святую память твою.

Слава, и ныне, Богородичен: Небесная врата и ковчег, * всевятую гору, * светозарный облак воспоим, неопалимую купину, * словесный рай, Евино воззвание, * вселенная вся великое сокровище: * яко спасение в Ней содеяся мирови, * и оставление древних согрешений. * Тем и вопиеш Ей: * молися Сыну Твоему и Богу, * согрешений оставление даровати, * благочестно покланяющимся всевятому Рождеству Твоему.

Песнь 4, глас 8.

Ирмос: Услышах слух силы Креста, * яко рай * отверзся им, и возопих: * слава силе Твоей, Господи.

Наслаждашеся богатый брашном, и одеяньми веселяся: Лазарь же насытитися желаше сего трапезы крупиц.

Пси убо облизоваху языком нищаго Лазаря струпы, сострадательнейшее бывающе, богатаго разума ко убогому.

Пред враты валяшеся древле богатаго, Спасе, Лазарь мучимь язвами убожества, отонудуже ныне прославляется.

Богородичен: Егоже родила еси Пречистая, моли спастися воспевающим Тя, от работы льстиваго, яко едина еси нам Предстательница.

Иный преподобныя, глас 6.

Ирмос: На Кресте Твое Божественное истощание * провидя Аввакум, ужасся, вопияше: * Ты сильных пресека еси державу, Блаже, * приобщаяся сущим во аде, яко Всесилен.

Яко Содетель человеческого естества, яко милости источник, и благоутробия богатство, ущедрил еси Человеколюбче прибегицу Твою, и исхитил еси сию губительнаго зверя.

Крест видети потщавшися, крестным просвещением Марие озарилася еси, Крестом беседовавшего, манием Божественным распеншися миру достоучудная.

Злых вина первее, сласть лукавая, многим бывши, аки солнце просиявши, всем наставница преподобная явися согрешающим.

Богородичен: Ум превозшла еси и небесный, мысленное небо всех Царя: законов бо естества вне Чистая Законодателя и Создателя всех родила еси.

Катавасия: Седяй в славе, * на престоле Божества, во облаце легце, * прииде Иисус Пребожественный, * нетленною дланию, и спасе зовущия: * слава, Христе, силе Твоей.

Песнь 5, глас 8.

Ирмос: Вскую мя отринул еси * от лица Твоего Свете незаходимый, * и покрыла мя есть чуждая тьма окаяннаго; * но обрати мя, и к свету заповедей Твоих * пути моя направи, молюся.

На Авраамлих недрах, Лазаря богатый егда узре, во свете и славе веселящаяся, отче, взываше, Аврааме, помилуй мя во огни осужденнаго, и языком люте пламенуема.

Насладился еси богатством жития веселяся, Авраам глаголаше богатому, отнюдуже мучишися zde вечно во огни сый, нищии же в веселии нескончаемом радуется Лазарь.

Жития прелестию богатый бых, якоже богатый житие все сластями иждивый, Человеколюбче: но молю Твоих щедрот, еже свободити ми ся огня, якоже спасеся Лазарь.

Богородичен: Матернее дерзновение к Сыну стяжавши Всечистая, сроднаго промышления о нас не презри, молимся: яко Тя и единому, христиане ко Владыце, умилостивление благоприятное предлагаем.

Иный преподобныя, глас 6.

Ирмос: Богоявления Твоего, Христе, * к нам милостивно бывшаго, * Исаиа свет виде в не вечерний, * из ноци утреневав взываше: * воскреснут мертвии, * и востанут сущии во гробех, * и вси земнороднии возрадуются.

Моисей прославился иногда на Синаи, Божия задняя таинственно виде в преславный, подписуя странное таинство: манноприемлющая же стамны ныне, образу пречистому тепле припадши, Мариа ангельское житие носит.

Храм благолепия Твоего вожделевши псаломски видети, умное же селение славы Твоея, Твой храм осквернившая: умными молитвами Христе, Твоего храма неiskusомужныя бывшия, храм мя вседетельнаго сотвори Духа.

Удою плоти, очесы многих уловившая, сластию краткою, снедь же диаволу сих сотворшая, уловлена бысть всеистинно Божественною благодатию Креста честнаго сладчайшая Христови снедь бывши.

Богородичен: Научен лик пророческий таинству еже в Тебе, таинственными богоглаголаньми Пречистая, Тебе многообразно предглагола: манноприемлющая же стамны ныне, образу пречистому сия припадши, Мариа споручница грешных к Богу.

Катавасиа: Ужасошася всяческая * о божественней славе Твоей: * Ты бо Неискусобрачная Дево, * имела еси во утробе над всеми Бога, * и родила еси Безлетнаго Сына, * всем воспевающим Тя * мир подавающая.

Песнь 6, глас 8.

Ирмос: Очисти мя Спасе, * многа бо беззакония моя, * и из глубины зол возведи, молюся: * к Тебе бо возопих, и услыши мя, * Боже спасения моего.

Богатый себе пламеню огненному осуди сладным житием: убогий же Лазарь нищету избрав в сем житии, сподобися нескончаемая радости.

В недрах Авраамлих Лазарь сподобися, вечнаго живота наслаждаяся: огню же богатый душею и телом осудися мучася.

Осужден есть во огонь богатый Лазаря ради: не осуди мене окаяннаго, молюся человеколюбче Господи, но яко Лазаря, света мя Твоего сподоби.

Богородичен: Да избавимся лютых прегрешений молитвами Твоими Богомати Чистая, и да получим Божественное просвещение, из Тебе несказанно воплощагося Сына Божия.

Иный преподобныя, глас 6.

Ирмос: Бездна последняя ...,

Радуются, Марие, ангельская воинства, равное преподобная житие сим в тебе зряще, и славу Господеви зовут.

Ужасаются бесов мрачных состояния, терпеливаго твоя крепости, яко жена преславно, и нагая, и единая сим возмогла еси.

Просияла еси аки солнце Марие всехвальная, и пустыню чудесы всю просветила еси. Темже и мене светом уясни.

Богородичен: Ангели, просветившеся славою Рождества Твоего, на земли мир всем нам, и благоволение человеком, Дево, возопиша.

Катавасиа: Божественное сие и всечестное * совершающе празднество * богомудрии Богоматере, * приидите руками восплешим, * от Нея рождагося Бога славим.

Песнь 7, глас 8.

Ирмос: От Иудеи дошедше отроцы, * в Вавилоне иногда * верою Троическою пламень пещный попраша, поюще: * отец Боже, благословен еси.

Иов якоже древле во гноищи червей и кале лежаше, такоже и пред враты богатаго Лазарь седяше, вопия: отец Боже благословен еси.

Валяясь пред враты немилосердаго богатаго древле Лазарь, крупниц желаше его трапезы, но никтоже даяше ему: и вместо сих обрете Авраамля недра.

Немилосердаго богатаго части, Христе мой избави мя, молюся, и убогому Лазарю счинив мя, вопити Тебе благодарно сподоби: отец наших Боже благословен еси.

Богородичен: Из утробы девственныя Воплотивыйся, явился еси на спасение наше. Темже Твою Матерь ведуще Богородицу, благодарно зовем: отец наших Боже благословен еси.

Иный преподобныя, глас 6.

Ирмос: Отроцы в Вавилоне ...,

Превеликий во отцех, обхожда пустыню, Зосима мудрый, преподобную видети сподобися: благословен еси, зовет же, Боже отец наших.

Что отче, странное всякия добродетели дательныя, видети пришел еси женище? преподобная вопияше старцу: благословен еси, зовет же, Боже отец наших.

Умертвивши блаженная страстей твоих взырания, к безстрастия ныне устремилася еси пристанищу, зовущи: благословен еси Господи Боже отец наших.

Богородичен: Зачала еси неизреченно, Дева пребывши Пречистая, и родила еси миру спасение, Христа Бога нашего: темже Тя вси песньми вернии величаем.

Катавасия: Не послужиша твари богомудрии * паче Создавшаго, * но огненное прещение мужески поправше, * радовахуся поюще: * препетый отцев Господь и Бог благословен еси.

Песнь 8, глас 8.

Ирмос: Семерицею пещь ...,

Во одежду багряную и виссон, и порфиру богатый древле облачашеся светло окаянный: убогий же Лазарь во вратех сего люте лежаше, крупниц падающих трапезы хотя насытитися, и никтоже подающе ему: темже в славе Христу сцарствует.

Во вратех лежаше богатаго Лазарь, согнив телом ранами, и хотяше насыщаться снеди, и никтоже даяше ему: но и пси сострадательно языком облизоваху гной и струпы его. Темже в раи сладости сподобися.

В сластех обогатех, якоже древле богатый, облачаяся на всяк день в багряницу: и аз Многомилостиве, в сладости жития сего себе осуждаю, сластями и прелестями. Темже молюся Тебе, от огня избавитися Христе вечнаго, во вся веки.

Троицен: Трисветлое Божество, единственную сияющую зарю, от единаго триипостаснаго Естества, Родителя безначальна, единоестественна же Слова Отцу, и сцарствующа единосущна Духа, дети благословите, священницы воспойте, людие превозносите во вся веки.

Иный преподобныя, глас 6.

Ирмос: Ужаснися бояйся небо, * и да подвижатся основания земли: * се бо в мертвецех вменяется в вышних Живый, * и во гроб мал странноприемлется. * Егоже отроцы благословите, * священницы воспойте, * людие превозносите во вся веки.

Глубины сердца испытуй, прежде бытия предведый вся наша, нужнаго жития исхитил еси прибежшую к Тебе Спасе, нужно Твоему человеколюбию вопиющую немолчно: священницы благословите, людие превозносите во вся веки.

О изменения честнаго, к лучшему преложения твоего честная! О любви Божественныя, возненавидевшия плотския сласти! О веры горящия и Божественныя, всехвальная Марие! Юже верно хвалим, и превозносим во веки.

Обрела еси болезней возмездие, и трудов твоих воздаяние честная Марие, имже низложила еси убийцу врага: и ныне со ангелы зовещи, песнь немолчно вопиющи, и превозносящи Христа во веки.

Богородичен: Всего обнови мя благости ради, во утробе Твоей Чистая, не растлив обоего естества свойств, яко всех веков Владыка: отнюдуже Тя, яко вину нашего спасения, песньми поем во вся веки.

Катавасия: Отроки благочестивыя в печи, * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте дела, * и превозносите Его во вся веки.

Песнь 9, глас 8.

Ирмос: Тя неискусобрачную ...,

Убогаго мя Лазаря Христе, молюся, соделай, сластей возжеления моя потребляя, яко естеством Бог: добродетельми же мя богата сотвори, да верою в песнопениях величаю Тя.

Богатый и немилосердый, ум мой презрех, верою Твоих заповедей Человеколюбче, пред враты повержен люте: но яко сострадателен и любощедр возстави, якоже древле четверодневнаго друга Лазаря.

Вси извыкохом притче Владычней, вси убо вернии возненавидим богатаго немилосердное, да муки избегнем, и в недрах Авраамлих присно ликуим.

Богородичен: Тя невидимаго Бога носившую объятии, на небесех певаемаго от всякия твари, и Тобою нам дарующаго всегда спасение, в вере величаем.

Иный преподобныя, глас 6.

Ирмос: Не рыдай мене, Мати, * зрящи во гробе, * Егоже во чреве без Семене зачала еси Сына: * встану бо и прославлюся и вознесу со славою, * непрестанно яко Бог, * верою и любовию Тя величающия.

Удобь претерпела еси, мати, пустынный труд, укрепляема державною силою Христовою: скверная бо помышления находящая, струями божественных слез угасила еси чистая, постников высоту, преподобных похвало.

Пресветлейшими лучами, просвещает тя едина свет рождающая Христа, Дева и Чистая: страшную врагом тя поставляет честная: явственную же всем Марие являет тя, страдалец красото, преподобных утверждение.

Оставивши мудренно земная вся, жилище честное Духа явилася еси: мирских убо лютых свободитися, моли единого Христа свободителя, верно совершающим Божественную память твою.

Богородичен: Законов естества Дево, паче естества утаившися, новое Отроча на земли родила еси Чистая, Законодавца суца и Ветха деньми, мысленное небо всех Творца: тем верою и любовию Тя ублажаем.

Катавасия: Всяк земнородный * да възграется Духом просвещаемь, * да торжествует же безплотных умов естество, * почитающее священное торжество Богоматере, * и да вопиет: * радуйся всеблаженная * Богородице, Чистая Приснодево.

Ексапостиларий утренний воскресный.

Светилен преподобныя.

Подобен: Небо звездами:

Образ покаяния тебе имуще всепреподобная Марие, Христа моли, во времени Поста, сему нам дароватися, яко да в вере и любви, тя песньми восхвалим.

Богородичен: Сладосте ангелов, скорбящих радости, христиан предстательнице, Дево Мати Господня, заступи нас, и избави вечных мук.

Слава: преподобныя, писан в Триоди. И ныне: тамже.

На хвалитех поставим стихов 8, и поем стихиры Осмогласника.

Таже преподобныя, глас 1:

Стих: Воскресни, Господи Боже мой, да вознесется рука Твоя, * не забуди убогих Твоих до конца.

Несть Царство Божие пища и питие, * но правда и воздержание со святостию. * Темже не богатии внидут в не, * но елицы сокровища своя в руки нищих влагают. * Сия и Давид пророк учит, глаголя: * праведен муж милуяй весь день, * наслаждайся Господеви, * и во свете ходяй не поткнется. * Сия же вся к наказанию нашему писахся, * яко да постящися благостыню творим, * и даст нам Господь вместо земных небесная.

Слава, глас 1:

Несть Царство Божие пища и питие, * но правда и воздержание со святостию. * Темже не богатии внидут в не, * но елицы сокровища своя в руки нищих влагают. * Сия и Давид пророк учит, глаголя: * праведен муж милуяй весь день, * наслаждайся Господеви, * и во свете ходяй не поткнется. * Сия же вся к наказанию нашему писахся, * яко да постящися благостыню творим, * и даст нам Господь вместо земных небесная.

И ныне: Препоблагословенна еси:

Славословие великое, и тропарь воскресен. Таже ектении, и отпуст.

НЕДЕЛЯ ПЯТАЯ СВЯТЫХ ПОСТОВ.

НА ЛИТУРГИИ,

Блаженна и Прокимен Рядового Гласа (на 8).

Прокимен, гласа:

И Прокимен, глас 4: Дивен Бог во святых Своих, Бог Израилев.

Апостол ко Евреем, зачало 321 от полу. [Евр. 9, 11 – 14.]

Братие, Христос, пришед Архирей грядущих благ, большею и совершеннейшею скиниею, нерукотворенною, сиречь, не сея твари, ни кровию козлею, ни тельчею, но Своею Кровию, вниде единою во святая, вечное искупление обретый. Аще бо кровь козлия и тельчая, и пепел юнчий кропящий осквернения, освящает к плотней чистоте, кольми паче Кровь Христова, Иже Духом Святым Себе принесе непорочна Богу, очистит совесть нашу от мертвых дел, во еже послужити нам Богу живу и истинну.

И преподобныя, к Галатом, зачало 208. [Гал. 3, 23 – 29.]

Братие, прежде пришествия веры, под законом стрегоми бехом, затворени в хотящую веру открытися. Темже закон пестун нам бысть во Христа, да от веры оправдимся. Пришедшей же вере, уже не под пестуном есмы. Все бо вы сынове Божии есте верою о Христе Иисусе: елицы бо во Христа креститесь, во Христа облекостесь. Несть Иудей, ни Еллин, несть раб, ни свободь, несть мужеский пол, ни женский, все бо вы едино есте о Христе Иисусе. Аще ли вы Христовы, убо Авраамле семя есте, и по обетованию наследницы.

Аллилуия гласа.

И Стих, глас 1: Терпя потерпех Господа, и взят ми, и услыша молитву мою.

Евангелие от Марка, зачало 47. [Мк. 10, 32 – 45.]

Во время оно, поят Иисус обанадесять, начат им глаголати, яже хотяху Ему быти, яко се восходим во Иерусалим, и Сын Человеческий предан будет архиреем и книжником, и осудят Его на смерть, и предадут Его языком, и поругаются Ему, и узвоят Его, и оплюют Его, и убьют Его, и в третий день воскреснет. И пред Него приидоста Иаков и Иоанн, сына Зеведеева, глаголюща: Учителю, хоцева, да, еже аще просива, сотвориши нама. Он же рече има: что хочета, да сотворю вама? Она же реста Ему: даждь нам, да един одесную Тебе и един опуюю Тебе сядева во славе Твоей. Иисус же рече има: не веста, чесо просита. Можета ли пити чашу, юже Аз пию, и крещением, имже Аз крещаюся, креститися? Она же реста Ему: можева. Иисус же рече има: чашу убо, юже Аз пию, испиета, и крещением, имже Аз крещаюся, креститася, а еже сести одесную Мене и опуюю, несть Мне дати, но имже уготовано есть. И слышавше десять, начаша негодовати о Иакове и Иоанне. Иисус же призвав их, глагола им: весте, яко мнящияся владети языки, соодолевают им, и велицыи их обладают ими. Не тако же будет в вас, но иже аще хочет в вас вящший быти, да будет вам слуга, и иже аще хочет в вас быти старей, да будет всем раб. Ибо Сын Человечь не прииде, да послужат Ему, но да послужит и даст душу Свою избавление за многи.

И преподобныя, от Луки, зачало 33. [Лк. 7, 36 – 50.]

В время оно, моляше Иисуса некий от фарисей, дабы ял с ним, и вшед в дом фарисеов, возлеже. И се, жена во граде, яже бе грешница, и уведевши, яко возлежит во храме фарисеове, принесши алавастр мира, и ставши при ногу Его созади, плачущися, начат умывати нозе Его слезами, и власы главы своея отираше, и облобызаше нозе Его, и мазаше миром. Видев же фарисей воззавый Его, рече в себе, глаголя: Сей аще бы был пророк, ведел бы, кто и какова жена прикасается Ему, яко грешница есть. И отвещав Иисус рече к нему: Симоне, имам ти нечто рещи. Он же рече: Учителю, рцы. Иисус же рече: два должника беста займодавцу некоему, един бе должен пятиисот динарий, другий же пятидесять. Не имущема же има воздати, обема отда. Который убо ею, рцы, паче возлюбит его? Отвещав же Симон рече: мно, яко емуже вящше отда. Он же рече ему: право судил еси. И обраща к жене, Симонови рече: видиши ли сию жену? Внидох в дом твой, воды на нозе Мои не дал еси, сия же слезами облия Ми нозе и власы главы своея отре. Лобзания Ми не дал еси, сия же, отнелиже внидох, не преста облобызаючи Ми нозе. Маслом главы Моея не помазал еси, сия же миром помаза Ми нозе. Егоже ради, глаголю ти, отпущаются греси ея мнози, яко возлюби много, а емуже мало оставляется, меньше любит. Рече же ей: отпущаются тебе греси. И начаша возлежащи с Ним глаголати в себе: кто Сей есть, иже и грехи отпускает? Рече же к жене: вера твоя спасе тя, иди в мире.

Причастный: Хвалите Господа с Небес:

Другий: В память вечную будет праведник: